

प्रादेशिक समाचार एकांश  
आकाशवाणी रायपुर (छत्तीसगढ़)  
प्रादेशिक समाचार बुलेटिन  
(छत्तीसगढ़ी)

18.10 शनिवार

दिनांक 14.09.2024

\*\*\*\*\*

प्रमुख समाचार –

1– छत्तीसगढ़ म एम.बी.बी.एस. के पढ़ई अब हिंदी म घलो होही–  
मुख्यमंत्री ह करीन घोसना ।

2– छत्तीसगढ़ समेत देसभर म आज हिंदी दिवस मनाय जात  
हे–प्रधानमंत्री, केंद्रीय गृहमंत्री अउ मुख्यमंत्री विष्णुदेव साय ह देसवासी मन  
ल दीन सुभकामना ।

3– प्रदेश के सबो नगरीय निकाय मन म आज ले “स्वच्छता ही सेवा”  
पखवाड़ा हगे सुरु – ये अभियान आगामी एक अक्टूबर तक चलही ।

मुख्यमंत्री–पत्रकारवार्ता

छत्तीसगढ़ म एम.बी.बी.एस. के पढ़ई अब हिंदी म घलो होही । ए  
घोसना अभी ले कुछेक देर पहिली मुख्यमंत्री विष्णुदेव साय ह हिंदी दिवस  
के अवसर म रायपुर के पत्रकार मनले चर्चा करत हुए किहीन । ओमन  
किहीन कि राज्य सरकार ह प्रधानमंत्री नरेंद्र मोदी के मंसा के अनुरूप  
छत्तीसगढ़ म चिकित्सा शिक्षा ल हिंदी म घलो उपलब्ध कराय के निर्णय

लेहे। श्री साय ह किहीन कि एखर सबले बड़का फायदा राज्य के ग्रामीण क्षेत्र म रहइया विद्यार्थी मन ल होही अउ ओमन अपन मातृभाषा म विसय के गहराई ल समझ पाही।

एक ठन प्रश्न के उत्तर म मुख्यमंत्री ह किहीन कि हिंदी म एम.बी.बी.एस. के पढ़ई के सुविधा ऐच्छिक होही। विद्यार्थी एम.बी.बी.एस. के पढ़ाई बर अंग्रेजी या हिंदी भाषा म से कोनो भी भाषा ल चुन सकही।

## हिन्दी दिवस

छत्तीसगढ़ समेत देसभर म आज हिंदी दिवस मनाय जात हे। चौदह सितंबर उन्नीस सौ उनचास के संविधान सभा ह हिंदी भाखा ल देस के आधिकारिक भाखा के रूप म अपनाय रिहीस।

प्रधानमंत्री नरेंद्र मोदी, केंद्रीय गृहमंत्री अमित शाह अउ मुख्यमंत्री विष्णुदेव साय ह हिंदी दिवस के अवसर म सबो देसवासी मन ल सुभकामना दीन। श्री मोदी ह हिंदी भाखा के महत्व के बारे म एक ठन वीडियो साझा करीन। उन्हें, केंद्रीय गृहमंत्री ह वीडियो संदेस म किहीन कि हिंदी दिवस के पचहत्तर बछर पूरा होवत हे अउ ए उपलब्धि राजभाखा के रूप म हिंदी के हीरक जयंती के रूप म मनाय जात हे। गृहमंत्री ह किहीन कि राजभाखा विभाग जल्दी ही हिंदी ले आठवी अनुसूची म सामिल सबो भाखा मन ल अनुवाद करे बर एक ठन पोर्टल के सुभारंभ करही। ए पहल के अंतर्गत पत्र या भाषण मनके बहुत कम समय म आर्टिफिसियल इंटेलिजेंस के माध्यम ले सबो भाषा म अनुवाद हो जही। ओमन देस के नागरिक मन ले हिंदी अउ क्षेत्रीय भाषा मन ल मजबूत करे बर एकजुट होय के अपील करीन।

ओति, केंद्रीय गृहमंत्री अमित शाह ह नवा दिल्ली म राजभाषा हीरक जयंती समारोह अउ चौथा अखिल भारतीय राजभाषा सम्मेलन म सामिल होइन। ओमन उद्घाटन सत्र ल संबोधित करत हुए किहीन कि सबो भाषा मन ल मजबूत करे ले ही एक मजबूत राष्ट्र के निर्माण होही। ओमन किहीन कि राष्ट्रीय शिक्षानीति म ए बात उपर विसेस जोर दे गेहे कि लइका मन ल ओखर मातृभाषा म ही शिक्षा मिलय।

उहें, मुख्यमंत्री श्री साय ह किहीन कि राजभाषा हिंदी राष्ट्रीय एकता अउ सदभावना ल बनाय राखे म महत्वपूर्ण भूमिका निभावत हे। हिंदी के सहज—सरल होय के सेति ए ह देस ल एकसूत्र म बांधे म अहम भूमिका निभावत हे।

ऐति, छत्तीसगढ़ म घलो हिंदी दिवस के अवसर म स्कूल, कॉलेज समेत अलग—अलग संस्थान मन म परिचर्चा, गोष्ठी, सेमिनार अउ कार्यसाला जइसे कार्यक्रम आयोजित करे जात हे।

### “स्वच्छता ही सेवा” अभियान

प्रदेस के सबो नगरीय निकाय मन म आज ले “स्वच्छता ही सेवा” पखवाड़ा सुरू होगे हे। ए दौरान नगरीय निकाय मन म “स्वभाव स्वच्छता—संस्कार स्वच्छता” के थीम उपर अलग—अलग गतिविधि मन ल संचालित करे जात हे। ए संबंध म नगरीय प्रशासन विभाग ह सबो नगरीय निकाय मन ल परिपत्र जारी कर “स्वच्छता ही सेवा” अभियान के आयोजन के निरदेस देहे।

नगरीय निकाय मन म स्वच्छता पखवाड़ा के दौरान श्रमदान के माध्यम ले वृहद स्तर म स्वच्छता अभियान अउ स्वच्छ भारत कल्चर फ़ैस्ट के आयोजन करे जात हे। संगेसंग स्वच्छता लक्षित इकाई मनके चिन्हांकन कर पोर्टल म मैपिंग करत हुए गंदा जघा मनके सफाई करे जात हे।

ए अभियान आगामी एक अक्टूबर तक चलही।

## राज्यपाल—वृद्धा आश्रम

राज्यपाल रमेन डेका ह काली रायपुर के माना कैंप स्थित राज्य सरकार डहार ले संचालित नवा वृद्धाआश्रम के अवलोकन करीन। ए दौरान राज्यपाल ह आश्रम म रहइया सियान मनले गोठबात कर उंखर हालचाल जानिन। ए मउका म श्री डेका ह सियान मन ले किहीन कि समाज के वर्तमान परिदृश्य आधुनिक सभ्यता के देन आय। रोजगार बर लइका मन अपन माता—पिता ले दूर रहिथे, जेखर ले सियान मन अकेला हो जथे अउ जीवन—यापन म मुश्किल के सामना करथे। ओमन किहीन कि आश्रम म रहइया सियान मन अपन हौसला बनाय राखय अउ आनंद के संग जीवन गुजारय। ए अवसर म ओमन कंबल, फल अउ मिठाई के वितरण घलो करीन।

उहें, राज्यपाल ह माना कैंप म ही स्थित एसओएस बालिका गृह पहुंचिन अउ उंहा रहइया बालिका मनले मुलाकात कर हालचाल पुछिन। ए बालिका गृह म अनाथ अउ एकल अभिभावक वाले बालिका जेखर उमर अट्ठारा बछर तक हे, इंहा निवास करत हे।

## साय—आभार

केंद्र सरकार ह किसान मन ल उंखर उपज के बेहतर मूल्य देवाय बर बासमती चावल ले न्यूनतम निर्यात सुल्क हटाय के संगेसंग खाद्य तेल के आयात सुल्क म बढ़ोत्तरी अउ प्याज के निर्यात सुल्क म कमी करे के निर्णय

ले हे। मुख्यमंत्री विष्णुदेव साय ह ए निर्णय के स्वागत करत हुए किहीन कि एखर फायदा छत्तीसगढ़ के किसान मन ल घलो मिलही। ओमन ए निर्णय बर प्रधानमंत्री नरेंद्र मोदी के आभार व्यक्त करे हे।

मुख्यमंत्री ह किहीन हे कि केंद्र सरकार के ए निर्णय ले निश्चित रूप ले सोयाबीन, बासमती, प्याज, सरसो, सूरजमुखी अउ मूंगफली के उत्पादक किसान मनके आय म वृद्धि होही।

### अरूण साव—अमेरिका प्रवास

उपमुख्यमंत्री अरूण साव अपन अमेरिका प्रवास के दौरान काली वाशिंगटन म सड़क अउ भवन निर्माण स्थल के दउरा कर काम मनके जायजा लीन। ए दौरान ओमन निवास स्थल म आर्किटेक्ट अउ इंजीनियर मन ले चर्चा कर सड़क अउ भवन निर्माण म प्रयुक्त होवइया सामग्री, धातु अउ मसीनरी के जानकारी लीन।

### आईपीएस—तबादला

राज्य सरकार ह भारतीय पुलिस सेवा के दू इन अधिकारी मन ल तबादला आदेस जारी करे हे। जारी आदेस के अनुसार भोजराम पटेल ल मुंगेली जिला के नवा पुलिस अधीक्षक बनाय गेहे। उन्हें, मुंगेली के पुलिस अधीक्षक गिरिजा शंकर जायसवाल ल पुलिस मुख्यालय म उप पुलिस महानिरीक्षक के पद म पदस्थ करे गेहे।

## माओवादी मुठभेड़

सुकमा जिला म आज सुरक्षाबल अउ माओवादी मनके बीच होय मुठभेड़ म एक इन माओवादी मारे गीस। घटना स्थल ले हथियार अउ भारी मात्रा म माओवादी सामग्री बरामद करे गेहे।

मिले जानकारी के अनुसार चिंतागुफा थाना क्षेत्र ले जिला पुलिस बल, डिस्ट्रिक्ट रिजर्व गार्ड—डीआरजी अउ बस्तर फाइटर्स के संयुक्त टीम तलासी अभियान बर निकले रिहीन, इही दौरान तुमालपाड़ के जंगल म घात लगाय बैठे माओवादी मन ह सुरक्षाबल उपर फायरिंग सुरू कर दीस। जवाबी कार्रवाई म एक इन माओवादी मारे गीस।

## विश्वकर्मा—जयंती

अवइया सत्रह सितंबर के विश्वकर्मा जयंती आय। ए अवसर म राजधानी रायपुर के बलबीर सिंह जुनेजा इंडोर स्टेडियम म प्रदेश स्तरीय श्रमिक सम्मेलन के आयोजन करे जाही।

ए मउका म संतावन हजार ले जादा पंजीकृत श्रमिक अउ ओखर परिवार के सदस्य मन ल अलग—अलग योजना के तहत करीब उनचास करोड़ चवालीस लाख रुपिया केंद्रीयकृत डीबीटी के माध्यम ले वितरित करही।

## हल्बी / गोण्डी-समाचार बुलेटिन

सुनइया मन ल बतादन कि काली ईतवार के “हल्बी” अउ “गोण्डी” बोली म समाचार बुलेटिन प्रसारित करे जाही। ए दूनों बुलेटिन आकाशवाणी केंद्र, जगदलपुर ले प्रसारित होही। जेला बस्तर संभाग म ही सुने जा सकही। हल्बी म समाचार बुलेटिन बिहनिया साढ़े सात बजे ले अउ गोण्डी म समाचार बुलेटिन संझा साढ़े छै बजे ले प्रसारित करे जाही।

## जिले की चिट्ठी

आकाशवाणी रईपुर के प्रादेशिक समाचार एकांश डहार ले प्रस्तुत कारीकरम “जिले की चिट्ठी” के प्रसारण काली संझा छै बजके 5 मिनट ले छै बजके 10 मिनट तक करे जाही। ए कारीकरम ल प्रदेस के जम्मों आकाशवाणी केंद्र मन ह एके संघरा रिले करही। ए बखत के अंक म “सक्ती” जिला के गतिविधि मन के बारे म जानकारी दे जाही।

\*\*\*\*\*